

四庫全書

集部

欽定四庫全書

後樂集卷六

宋 衛涇 撰

表狀

賜進士及第謝皇帝表

臣某等言伏蒙聖恩賜臣等進士及第者參綱條而上
對僅畢奏篇侈命服以中盼濫階士版名傳臚句聲籍
士林雖為祖宗之成模乃有臣子之深懼中謝竊以科目
取士雖勢使然言語求人其難久矣矧臨軒之舊典有

操牘之常程泛獵陳言用塞明詔學固不躋於奧閫責
豈專在於有司嘗繹幼聞粗知深旨惟賈誼之疏於漢
雖曰通達而未諳諸老持重之謀而劉蕡之策於唐雖
號讜忠而尚貽史臣疏直之歎夫豈賢者之過抑知時
論之難辱在選中施及臣等永懷先哲如景高山雖釋
褐命官曾不間於楚粵閩蜀之畷然探端知緒豈盡達
於虞夏商周之宜俯愧淺聞仰辜清問茲蓋恭遇皇帝
陛下至誠贊化皇極敷言體柔克以居高以剛中而行

健扶攜直諒諷訪謀猷要使芻蕘之作興必先尺度之
疏濶致茲孱陋有此遭逢鳬鶴短長盡出陰陽之開闔
鯢鵬變化可占江海之閔深上以名求下以實稱臣等
誓堅素節勉效前修拜敕在廷方被采葑之寵捐軀報
國終存橫草之忠臣等無任

賜進士及第謝太上皇帝表

臣某等言云云總章晝訪俯逮芻蕘廣陞臚傳寵加韋
布侈千載遭逢之幸拜兩宮涵養之恩進冒光榮退懷

兢灼臣等中謝竊考人材之盛欽聞治古之隆清問博詢
疇咨精選既自為股肱之用勵翼而致時雍復留如元
愷之才封殖以待帝舉惟今日勲華之懿來衆言掇契
之忠俾無諱於有司咸展盡於底蘊儻非宗論曷副詳
延如臣等問學迂疎器資凡陋親逢盛旦徒有樸忠草
芥荒蕪安識朝廷之典故簡編陳腐不知言語之精粗
誤塵中御之觀敷錫太常之第載循其本必有可遵茲
蓋恭遇尊號太上皇帝陛下與天為徒順帝之則崇詩

書禮樂以造士設庠序學校以明倫陶教育於三紀之
餘煥文章於百王之上聖作明述適觀潤色之傳德進
言揚罔俾忠嘉之伏特旌後學往繼前修臣等謹當尊
其所聞期以不負敬修可願敢懷人爵之縻增益未能
終冀天工之亮臣等無任

謝賜聞喜宴表

臣等言伏蒙聖恩賜臣等聞喜宴者據經上對甫趨廣
殿之廬式宴示慈重拜大官之品仰霑膏飫俯極感藏

臣等中謝伏念臣等猥以寒生適逢熙運業僅專於鉛槧
樂不改於簞瓢黼座雍容特垂清問卮言猥并各罄丹
衷懷野人願獻之芹遇治世求箴之木匪獨就班於科
級繼蒙均賜於賓筵簪會曲江不數唐人之故事樂諧
韶箠獲聞虞氏之餘音肴核踐嘉豆觴交錯洽醴醪而
自愧誇里巷之為榮茲蓋恭遇皇帝陛下廣運聖神旁
招俊入需雲渥采衣被草茅湛露靈光發輝葵藿俾知
燕喜之盛獨在賢材之多臣等敢不祇佩殊恩答揚異

數加籩有秩既歌飽德之詩覆餗是羞彌篤食功之訓
臣等無任

謝賜花表

臣等言伏蒙聖恩賜臣等聞喜宴花者燕錫公堂甫拜
需雲之澤花頒禁籞仍沾滑露之恩香風徧襲於衣冠
淑景頗移於尊俎事維循舊寵實更新臣等中謝伏念臣
等蕭艾凡姿草茅鄙習秀發尚慙於儒藻竒芳未吐於
天葩追攀杏苑之英游濫陪式衍緬想鶴林之佳致忽

覩仙標叨被恩榮益增愧懼茲蓋伏遇皇帝陛下作人有績與物為春密移造化之功大肆乾坤之渥臣等敢不祇承帝賚榮戴龍光追琢其章謹拜生成之賜英華發外願宏充實之輝臣等無任

謝頒冰表

臣某等言伏蒙聖恩賜臣等聞喜宴頒冰者翥若需雲方啟初筵之秩霈然湛露遽叨凌室之頒盡滌煩囂頌忘炎燠臣等中謝竊以夏頒秋刷雖常誦周官之文陽出

陰藏亦竊窺魯史之旨顧方安藜藿之陋奚暇為饗殮
之謀不圖寒士之幸逢亦預夏時之蕃錫惟其疵賤敢
自意於屬饗故此戰兢凜莫勝其履薄茲蓋伏遇皇帝
陛下功參化育義篤臣工大亨不吝於養賢菲飲惟專
於挹已燭知惻惻懷憂時若渴之心澡雪肺腸過推食
解衣之惠臣等敢不益思修潔仰對恩榮厚澤所加方
詠春開之雅躁心一洗先逃夕飲之譏

淮東提舉到任謝表

班行寓趾積愧空餐淮壤觀風猥叨隆委方退嚴於親
養俄趨奉於戌期入境載驅視章惟謹中謝臣起身寒遠
逢世休明誤當慈極之詳延擢以太常之首選頃從幕
府詔詣公車藏室蓬萊多愧並游之俊縹囊絀素獲觀
未見之書嗣際興王游塵清貫約麟編而抱槩森皇屬
以橫經承攝郎闈倏周歲薦義當引去初自詭於偏城
思許便私適榮分於一節惟時楚甸實屏吳都號稱財
賦之淵允資鰈萍之利姦蠹殆成於積習源流盍審於

隄防矧復偽錢之行重為艱食之害幸今畧定善後伊
何宜妙簡於髦英往具宣於德意如臣素乏可稱之望
謹言所與之輕茲蓋伏遇皇帝陛下愛護羣生照臨百
辟豈特適均中外示以微權抑將詳試才能儲之有用
責任綦重戰兢靡寧臣敢不祇服訓詞益修職業裕民
足國必明取予之方攬轡登車尚厲澄清之志

浙東提舉到任謝表

祇奉恩言載馳輶傳顧罔堪於已試曾敢冀於後圖中謝

伏念臣頃以辭藝得官本無材術濟世遵故事而登冊
府累數載而並英游學力單微覺歲年之尚早誠衷膚
薄繇志氣之未充所願溫故習於私庭庶或展寸長於
異日昨蒙誤寵遽俾觀風服勞敢憚於咨詢守拙每忘
其寡陋攷言弗績尸祿奚為豈期易地之除靡及循牆
之避惟人情退怯於隱約之後而物論難容於瘝曠之
餘顧是洪私淒其小已矧內甸不輕置使蓋若時屢選得
人殆覺庸虛愈難稱塞茲蓋伏遇皇帝陛下以積久而

改察庶政以更試而審驗羣工賜以曲成責其求效臣
惟當黽勉寧恤悔尤知王事之為難抑君門之甚邇簿
書繁密雖非素習之長閭巷隱微終幸徹聞之速冀甦
民力少答主知

謝授衣節物劄

山川蒙露感嘉節以旋歸分野占星來湛恩於錫予涵
濡厚澤衣被榮光酌天序之推移慮使將之匱薄乃稽
令典有赫賜儀消息與時尚識授衣之旨動容中禮敢

窮吹帽之歡

辭免正除中書舍人奏劄

臣竊以中書與聞幾事內史職贊命書使之播告有孚之惠心杜防未形之闕政是為禁筦之地必登洪碩之儒分押六曹號稱三字熙朝尤重作誥是官不輕畀人當時才豈為難猶或試而後授矧惟立事建功之意繫於發號施令之間欲效涓塵之愚豈特詞采之末伏念臣流落江湖之久更嘗憂患之餘乏文字之芳鮮視筆

研為鹵莽不堪承攝敢冒躡除欲望皇帝陛下收還誤恩改畀廷彥庶全愚分免速人言

謝正除中書舍人表

議禮奉常攝官詞掖深慙假寵更忝真除中謝竊以西臺機務之原實陪國論內史贊書之職廼代王言若昔盛時有嚴此選歐陽修擢陞於慶厯之始尚云發揮之難王安石拔用於嘉祐之間亦謂討論之重蓋以凡庸之筆擬為聖哲之辭凡號發而令施欲言約而體備所謂

有制有詔皆欲見心見情苟非語中經綸學通今古文
挾河漢氣侔芝蘭則何以裁成帝謨誕告羣聽是以一
世數人之傑無愧前修求復三代兩漢之風猶有遺恨
矧今潤色鴻業恢張皇猷出言如綸道難明之法意若
古有訓勵丕作之庶工苟非降才之爾殊誠恐動人之
效淺如臣底滯何所發揮一違螭陛之班久斷鈞天之
夢自慙鉛槧甘永墮於塵蕪長分桑榆難重收於翰墨
敢謂漁樵之散跡復堪黼藻於斯文望鳳闕之深巖負

鵜梁而悚慙茲蓋伏遇皇帝陛下追還朴質剗革瑇華
起之江湖之中付以禮樂之事騏驥一躍期十駕之與
齊洪鍾千鈞付寸莛而發響臣敢不勉殫末技仰答殊
私日月麗天莫效昭明之助雷霆驅令誓彰鼓舞之神
臣無任

辭免左侍郎兼侍讀奏劄

臣竊以三銓任劇亞旅班清稽近比以具存在真除而
尤重蓋以選部抑揚之柄實關人才通塞之機匪徒拘

資格之微文必欲稱權衡之公選如臣器能譎薄識趣
迂凡荐罹憂患之餘寢隔雲霄之夢冗散再收於孤蹟
踐教疊冒於殊私方汙兩制之華俄畀六卿之貳使年
歷歲遷而后至猶位尊德薄之是慙矧涉日之未幾而
叨榮之已甚至若邇英之席尤高執讀之聯昔聞疇政
路之舊臣今以處禁塗之宿望雖云暫攝詎可冒居伏
望皇帝陛下察父垂慈隆天徧燾並回誤渥改授時髦
庶裨聖世之審官亦助宸襟之典學

辭免兼侍讀奏劄

臣祇聞寵渥倍切戰兢臣竊惟勸誦名官邇英高選開
元之擇耆學實賴於質疑興國之擢名儒允資於顧問
皆參處故老舊臣之重或詳求洽聞博物之流斯能發
揮於聖謨所以開廣於上意如臣淺陋暫此攝承每懷
越俎之慙安有執經之益方念不當於久假豈宜更玷
於為真非比他官更容序進伏望皇帝陛下亟收成渙
俯察由衷別延鴻碩之儔用效緝熙之助毋使妨賢而

積愧庶幾量分以少安

謝兼侍讀表

勸誦在後方懷承乏之慙積薪居前驟玷為真之寵惟
學術處衆人之底而班聯躡三侍之先非分所安以榮
為懼中謝竊惟金華列職均以論說名官麗正置員尤以
顧問擇士蓋敷繹經誼拘以分章摘句而周覽史籍得
以隨事獻言豈獨閱塵編而夸稽古之榮所欲監成憲
以明採時之務故司馬據漢紀而陳法度變更之病蘇

軾因寶訓而述賞罰善惡之規儻非儒紳宿望之流曷
副帝幙上游之選伏念臣見聞單淺涉獵迂疎蚤事繫
鉛不過書生之陳腐晚污筆橐莫殫禁從之論思入閣
未補於萬分代庖甫逾於累月誤蒙序陟實愧前修茲
蓋伏遇皇帝陛下清明在躬緝熙典學無他嗜好惟留
神載籍之文當此修攘猶不廢儒書之務尚取材於末
藝俾陪論於細旃臣敢不俯聲微忠仰酬殊遇求歷代
之訓寧敢希倚相能讀之才進堂下之言或能效輪扁

至愚之慮臣無任

謝賜生餼表

紀桑蓬而興感俯念親恩捧綸綍以知榮仰勤君賜出
大官之蕃渥為私室之寵光臣某中謝伏念臣憂患餘生
遭逢昭代因心盡孝莫酬父母之劬勞委質移忠懼負
聖明之任使自塵邇列適踵多虞體肝食之懷方務裨
於搏節積素殫之愧敢更冒於匪頒寧謂微踪亦闕睿
聽賁詔旨之溫潤萃賚典之豐腴醢醴孔嘉廩庖有繼

祗載殊私之厚豈云故實之常茲蓋伏過皇帝陛下祿
謹詔功錫先予善斂敷五福均符欲壽之情體貌羣工
優示共賢之意臣謹當職思歸美食戒過浮覆餽預憂
曷辱大亨之禮投醪圖報期臻既醉之詩臣無任

謝牲餼狀

餉餽相望府無虛日餼牢甚腆官用彝章行慕有羶禮
循考牧致大亨於鼎象侈備物於魚麗割肉以歸奚取
詖諧之辯賜生必畜敢隳鄉黨之儀

明堂大禮畢皇后賀皇帝表

裡祀合宮邦儀維穆需思端闕民福攸同慶洽天人歡
均家國恭惟皇帝陛下邁承寶命寅御珍圖闡列聖之
彌文恢九筵之宏制灌玉清廟聿嚴孝饗之誠升烟太
虛丕格歲成之報靈心歆顧協氣旁流臣妾叨正坤闡
助修陰教迄成熙事幸際休期瞻宣室之受釐率掖庭
而稱抃

辭免權禮部尚書奏劄

銓筦劇曹久慙充位春卿高選忽俾攝官聞命若驚拊躬增惕竊惟古三后之典禮固異有司今六職之分聯均為率屬必得老成之彥與夫鴻碩之英克踐前修始符妙簡伏念臣迂疎末學憂患餘生九載丘園退安於閒散兩年班列驟玷於清華在小臣已極超躡之逾於公朝曾無毫髮之補深虞幽黜乃辱褒遷方國家激厲人才之秋正陛下愛惜名器之日況復職司於獻納尤難身冒於寵榮自揣甚明人言可畏伏望皇帝陛下廣

隆天之覆垂察父之慈曲鑒由衷追還成渙非特安臣
子愚慙之分亦以裨明時綜核之心

辭免除御史中丞奏劄

竊以國家之弊實由官邪法令之行必先近始自昔中
司之建號稱獨坐之雄本朝多虛位而不充累聖必得
人而後畀竊觀近事寔異昔時上下之情隔塞而弗通
縉紳之氣萎荅而不振久矣紀綱之弛玩幾於邪正之
混殺天誘宸衷躬發英斷當庶政更新之始乃羣心聳

聽之時必得不畏彊禦深明國體之人庶幾大有振作
以慰天下之望如臣弱植惟抱樸忠積年流落之餘絕
意清華之夢雖塵禁列常負隱憂身玷論思猶乏秋毫
之益職當彈劾難求風采之強伏望皇帝陛下睿鑒博
臨乾剛獨運矧屬萬幾之親攬尤須百辟之肅清願別
東於儒英以增重於天憲庸副厲精之治免累知人之
明

辭免除端明殿學士簽書樞密院表

臣聞命震驚拊躬跼蹐竊以事樞之重兵本所關僉預
籌帷體鄰丞弼用人得失繫國重輕矧今內當更化之
初外飭禦戎之務尤宜精選宿彥允合衆心而後朝廷
繇輔相而尊天下受仁賢之福豈應親擢首及凡材如
臣識淺學迂質微能薄久安田里與世闊疎自玷班行
畧無補報迺者乾剛奮發元惡殄除徒以微臣孤立之
蹤置之絕席敢言之地片忠未吐誤寵驟放旬浹之間
恩華狎至不惟濫陪宥密難稱隆知至於多取器名殊

非素志况收召諸老人望方歸布列羣工儒猷不乏如
臣極陋焉敢冒居伏望皇帝陛下察臣非據之危鑒臣
由衷之請許其懇辭成命克保廉隅使之姑處舊官少
殫綿薄臣無任

第二表

封章上達懇辭樞筦之嚴淵聽未回仍拜宸綸之渥敢
申再瀆終覲曲從竊以當平世而本兵猶非易事以儒
臣而經武必屬全才矧邊徼未底於求成而貔虎尚勞於

遠成方改絃而易轍圖繼好以安民中謝伏念臣資本凡庸學非淹貫自還班列未效涓埃比溫長於霜臺惟恐辜於風憲為陛下息邪而扶正或可輸忠助陛下厭難而折衝若為稱職雖二府班聯之暫闕然四方耆舊之鼎來豈容未淹旬浹之間遽俾晉冒樞機之任伏望皇帝陛下旁蒐遠攬公聽並觀念茲多事之秋宜得殊常之彥不遐有佐俾運籌帷幄之中無競維人庶消患廟堂之上姑安舊次免速煩言

謝除端明殿學士簽書樞密院表

持綱憲府甫叨耳目之司涉筆幾庭驟玷腹心之地更
化方新於庶政用人首及於孤蹤居帷幄以知慙捧絲
綸而增懼中謝竊以萬兵之柄在於彊本而折衝四輔之
官難以具臣而充位矧太阿倒持之久當神樞獨幹之
初外欲銷戎寇之祲氛內欲肅朝廷之綱紀必得壯猶
之老始參基命之嚴伏念臣學淺而識迂材綿而器薄
頃觸危機而去國久絕榮望之萌心十年馱畝之忠無

階自達兩載班行之蹟欲去未能幸日月之昭明適雲
霾之屏息豈期簡拔誤取戇愚獨俾霜簡之抨彈少吐
丹誠之激烈忽驟緣於人之俾晉預於廟謨自惟周旋
一職之常材何以參典萬幾之不務瀝懇辭而惕若思
報效以茫然茲蓋恭遇皇帝陛下德照百官治嚴八柄
厲精更始大明兩觀之誅公聽並觀載廣四門之闢遂
令疎遠廼冒延登臣敢不寢寢匪躬孜孜盡瘁愛君體
國惟務竭於小心繼好息民思勉裨於大計臣無任

謝賜對衣金帶鞍馬狀

書殿幾廷方冒殊常之寵天閑御府併叨著錫之加德
不稱以懷慙眷愈隆而增懼伏念臣起家韋布比質駑
駘子路縕袍安有輕肥之念塞翁失馬久諳禍福之心
值聖明濬發於乾剛俾孤遠濫顯於風憲未踰旬浹何
補秋毫俄晉幹於鴻樞更鼎來於異渥曳婁且煥煥珍
帶以紆華磬控生榮駉文韉而驚駿特循舊比增賁屏
軀茲蓋伏遇皇帝陛下駕馭羣工衣被萬物敝思予改

有如好善之誠既閑且馳庸示求賢之篤而臣折腰有愧顧影自憐拾芥取青敢詫明經之效陳廷拜賜終慙稽古之功

辭免再賜對衣金帶與鞍馬奏狀

被命之初已經宣賜安有浹旬之近游膺蕃錫之加稽首雖榮拊躬若厲伏望皇帝陛下察臣驟蒙獎拔未有補於秋毫憐臣深畏滿盈寶難勝於天寵特頒睿旨追寢誤恩庶寬淵谷之虞彌載乾坤之造

辭免兼權參知政事奏劄

一介慙愚誤蒙拔擢承乏幾庭力輕任重方慙非據見
具控免洊放隆旨俾攝政塗與聞國論如臣初無材術
徒有樸忠使之涉筆本兵猶難冒處若復共二諧弼必
致顛隳矧僉典樞務稽之舊比任亞疑丞上兼參預尤
為超躡恩榮狎至震懼深夫量材受任弗輕以假人
者君父之明陳力就列不能而知止者臣子之誼伏望
皇帝陛下曲垂睿照俯諒衷誠毋反汗以為嫌必得賢

而共政

辭免除參知政事奏劄

成命初頒師言未穆微臣自揣倍切兢惶臣聞褒陟有序則上既可以正國體而尊朝廷遷進太數則下或無以厲廉隅而壓物望伏念臣遭值陛下更化之始親蒙眷簡擢長風憲凡弊政之當革官邪之當糾猶能為陛下下一一疏舉甫及旬浹而拜僉樞之命曾未信宿又俾暫陪國論是時巨蠹雖除庶事未定內而政地適多虛

員外而諸老驛召未至是以不敢崇飾虛遜黽勉共職
逮今僅踰一月而臣智識短淺材力綿薄其於邊條之
科瑣有司之程度且未暇究見顛末况修明綱紀選拔
人材豈有涓埃小裨海嶽忽蒙聖恩躡置東府在臣進
退誠不遑安矧今衆正旁開耆英就列器能既出臣之
右年德又於臣為高詎應以一介孤遠之蹤乃獨先白
首魁壘之彥臣用敢披瀝忱悃仰干洪造伏望皇帝陛
下憐臣粗明於分義察臣深畏於滿盈畧反汗之小嫌

還出綸之誤渥儻陛下未忍捐棄或尚容備數舊官免
速顛隳實為全覆所有恩命未敢祇受

辭免除參知政事表

右府充員罔功是懼東臺共政懇避弗俞顧自揣之甚
明必終辭而廼已中謝竊以三三大臣之遷進異乎凡百
有司之選除雖日月至焉尚欲熟觀其器識使名稱籍
甚尤當詳試以事為矧平時望實之未孚而一旦超踰
之太驟甫四更於旬浹俄三冒於恩綸伏念臣孤立班

行遇知明聖天威濬發首擢長於霜臺風憲未張復晉
陪於斗幄幾務叢積則謀謨之安取文書繁劇則省閱
之靡皇遽因承乏之官徑畀為真之寵惟昔者濫施於
名器繇權臣久擅於福威每假邦彝私植恩地既曰更
新於聖化詎宜循襲於陋規覆轍在前改絃恐後方今
環布列序者甄收或未徧陸沉遠外者招徠尚有遺苟
大僚拜徙之日聞實公論譏評之可畏伏望皇帝陛下
深圖實政無取美觀周大老歸首起耆英之望范宣子

遜尤高廉退之風俾愚臣姑即於故官庶積久漸收於
微效下人輕上爵當澄微幸之源高位實疾顛亦免滿
盈之咎臣無任

謝除參知政事表

涉筆紫樞未究萬兵之本聯班黃閣驟叨兩社之崇責
重望輕身微恩大臣某中謝竊以立政造事必資碩德之
臣前凝後丞夫豈叙遷之位名副其實則有折衝銷萌
之效用非真材則招括囊尸素之譏歷考前猷悉繇博

選范仲淹累更劇任而後參預於慶厯之際歐陽修久
養雅譽而方弼諧於嘉祐之初皆推衆正之宗廼在同
寅之列矧當攬權而更始莫若籲俊以為先綱紀欲修
弊蠹將革一相聿新於總職四鄰尤賴於得人如臣者
惟有樸忠本無智畧生平所學獨懷尊主之誠粵自立
朝期踐為臣之誼夷險悉安於愚分榮貴固非其初心
敢謂殊知荐蒙顯擢長南臺之風憲坐席靡溫陪右府
之訏謨除書猶濕偶緣人乏疊被寵光矧日月之未淹

曾涓埃之莫報三垂徂定曷裨前箸之籌諸老曷來每
愧後薪之積甫冒柄除之暫攝復驚宸命之為真沐雨
露以滋深履淵冰而益懼懇辭弗獲躡處非宜茲蓋伏
遇皇帝陛下秉哲在躬推誠任下去凶而舉元愷咸服
大舜之公分職而責孤卿方董成王之治肆令微蹟上
弼清衷凜然稱塞之難誤此延登之異臣敢不恪堅素
節勉翼熙圖輔周典以靖四方汔思來效述臯謨而贊
百揆惟務協心臣無任

辭免提舉修史等兼職奏劄

提舉國史院權提舉實錄院權提舉

編修國朝會要同
提舉編修勅令

竊以幾庭預政方膺共二之求史觀提綱參預約三之法忝冒僅踰於旬浹寵榮疊拜於宸綸揣分難勝鞠躬以避伏念臣性資滯固學殖荒蕪寡謏見聞牘記右尹祈招之什拘牽文義安識司空城旦之書惟聲明莫盛於累朝而述作若稽於前代華簡編於翰墨炳金玉於科條必求殫洽之英始稱纂修之任矧是本兵之寄適

當經武之秋使專意於憂邊猶虞曠戾暫與聞於出命
實負凌兢儻更兼潤色之工將必速顛隳之悔伏望皇
帝陛下大明委照全度包荒察所控之由衷亟收還於
成渙文謨武烈既允屬於三長蕭規曹隨宜併顯於一
老庶安愚分免累洪私

政府緣以旱蝗同執政乞去奏劄

臣等仰惟陛下寅畏天命法商宗之祗懼昭事上帝如
文后之小心恭儉寡欲無逸德過行以干陰陽之和寬

仁愛人無嚴刑峻罰以召乖盭之氣不幸權臣弄兵三
邊百姓橫罹鋒鏑輓輸科斂海寓繹騷陛下引咎責躬
怨艾深切屈已就和凡以為民是宜天意悔禍庶徵時
若三辰順軌而自春徂夏時澤又愆兼旬以來螟蝗大
作白晝過都羣飛蔽天乃甲子之日星文變異衆目共
睹推原灾咎實在臣等夫以陛下天姿明聖而臣等不
能究宣職業以贊維新之政陛下宸衷惻怛而臣等不
能推廣恩澤以慰更生之民賞罰過差刑獄淹滯積成

愆繆感動穹昊致使陛下展轉焦勞獨任其咎一人慊然抑畏於上而諸臣偃然尸素於下事為倒置誼豈遑安伏望皇帝陛下亟奮威斷並從黜免庶少寬於聖意亦漸格於天心臣等謹已出郊待罪伏乞睿旨即賜處分臣等無任

丐祠劄子

臣一介鯁生至愚極陋惟知涉獵章句以為應舉覓官之資遭值孝廟臨軒策士誤蒙親擢遂竊虛名徧塵三

館兩持使節遽丁內艱甫及終喪復叨收召旋自都司
濫躋柱史將聘鄰壤甫竣使事即伸更迭之請已蒙陛
下除職與郡竟以罪行臣向來區區出處本末如此人
或知之不復辨數自是纏綿憂患屏息田里首尾九年
絕意榮望中間國論鄉評善類復用陛下記憐孤遠畀
以郡寄偶因入奏再玷班行遂繇奉常寢陞從列冒兼
兩制猥厠六聯屬大正於朝綱俾晉顯於風憲蔑聞勞
效忽預樞機曾不踰時又參大政陛下用臣既傷於太

驟微臣揣分自愧於非才然方是時外之耆老檄召未
來內之宰輔虛位實衆臣冒昧承乏不容終避加之和
使雖遣尚未堅決苟求去位殆謂辭難今揆度機廷無
非妙選明儒宿望並集本朝張彊渡淮更成可必若復
貪戀榮祿則必上負誤國之罪下獲妨賢之譏兼臣積
憂薰心早衰多病狀似彊健中實疲羸一有煩言重罹
大譴陛下雖欲保全亦無及矣仰冀陛下鑒臣懇懇之
危衷全臣區區之晚節許解機政改授外祠凡未委溝

壑之前皆圖報君親之日臣即已出郊待命伏望聖慈
即賜處分臣無任

第二次丐祠表

臣某言早來具劄子面奏乞解罷機政界以外祠出郊
待命伏蒙聖恩特降中使宣押赴都堂治事者危衷亟
吐溫旨未俞誼既難安理須再瀆中謝伏念臣無軻雄之
學竊晁董之科流俗既譁其虛名清朝亦待以異數粗
嘗有志矧當勵精更治之時自審非才終匪扶顛持危

之手下有譏評之交至上而譴告之相仍久合弓於免
歸迹恐隣於規避今則信使通而無壅敵兵撤以盡還
百萬生靈行有息肩之漸二三宰輔又皆同德之良何
取臣愚尚妨賢路竊考祖宗之盛際最為體貌於近臣
或自詭於投閒率從容而去國孝皇晚歲自黃洽蕭燧
之外比比有人陛下初年由鄭僑何澹而後寥寥罕見
得非貪戀不明去就之幾是致傾搖終費保全之力臣
之當去今也其時苟必待公言彈劾而后歸亦豈是聖

主延登之初意伏望皇帝陛下矜其惻款惠以始終許
退處於田廬俾夤修於香火珍臺閒館倘舊觀之復還
墜履遺簪亦後來之知勸臣無任

第三次丐祠劄子

臣昨以輔政亡狀連具封章仰干旒宸乞從免歸豈謂
天聽崇高臣言拙訥未能感動尚示眷留一日之間兩
勤中使宣押此所以待元勲茂德顧臣何人乃敢當此
然體貌之禮在陛下既極於優隆去就之誼在愚臣難

避於煩瀆伏念臣本無材術徒抱樸忠方其壯年彊健之時粗可盡力州縣簿書之務誠不自意屏息八年遭逢一旦夤緣兩地倏已半期勞效蔑聞罪戾崇積自叨簡拔物望不孚街譚巷議公肆詆毀矧陛下躬親萬幾新美庶政和議既成根本尤當自治流民雖復經理尚須良謀圖事揆策合屬耆俊今內有白首魁壘朝夕論思之故老外有勤施四方獨當一面之重臣至於舊學鴻儒幾廷宿望或尚辭命召或久處燕閒年德既居臣

之前績效又出臣之右豈容後先倒置逸勞絕殊揣分度時宜去決矣區區危懼竭盡於斯臣恐勤宣押未敢再出郊外見居家待命伏望睿明亟賜處分臣無任

第四次丐祠劄子

臣近三具表劄祈解機政伏蒙陛下禮貌優渥申放詔旨又蒙兩遣中使至臣私第賜臣批荅不允仍斷來章及宣諭令赴堂治事臣一介孱陋心非木石感激恩遇退深戰慄豈不貪戀明聖固欲輕違軒陛自干方命之

誅實緣私計怵迫誼不容留須至煩瀆天聽臣聞人臣事君之誼不以苟去為高人君待臣之禮不以苟留為恩蓋才術駕下謀謨淺拙自知無補求去已晚何足為高委任既隆課效蔑聞人言籍籍雖留何用未可為恩臣於二者可謂兼之若復遷延顧望遲疑不決國有清議朝有憲章亦非陛下所得而私雖欲不加汰斥不可得已臣晝度夜思計之甚審瀝血剗心呼天號父惟有拙誠更無他說陛下與其留臣以及於物論沸騰之際孰

若聽臣引去於罪戾尚輕之時非特陛下有以保惠微臣微臣亦得以自全晚節更生之賜孰大於斯臣昨日嘗奏劄子乞尚書省繳進未蒙處分今再附勅使申奏欲乞聖慈檢會前劄併賜降出除臣一在外宮觀臣瀆犯天威下情無任

第五次丐祠劄子

臣自前月二十九日以後兩嘗面奏五上封章乞解罷機政伏蒙聖慈特飭中使宣押者三宣諭者再早來又

降御筆備行嘉獎曲示眷留陛下恩遇微臣至矣盡矣
顧臣草芥微生迂疎末學何以仰承體貌之重感恩至
骨流涕何言儻於誼可以少安臣豈敢固執愚見惟是
輔政半晷績狀蔑著欲去之心雖因今日而有請宜去
之罪不待今日而始彰何俟人言自知甚審臣自還鄉
列繼忝從班職在論思事之利害無不當言者方權臣
橫挑兵端雖不謀之在廷然命使調兵豈無朕兆臣不
能先事救正逆折其萌坐見師徒撓敗糧械喪亡三邊

繹騷赤子塗炭臣宜去之罪一也侂冑擅朝威福由已
兵敗國危人怨神怒臣又不能蚤白其姦使禍稔惡積
意將罔測致陛下親發威斷僅克翦除臣言固已晚矣
臣宜去之罪二也復讐本為大誼而權臣規畫無素輕
易寡謀兵連禍結敵得歸曲於我首禍雖誅猶肆疆橫
邀索無厭臣時以備員二府又無深謀至計以折衝銷
難陛下為之屈已就成歸俘增幣雖幸疆場稍定信使
已通然耗竭事力虧傷國體有過無功人言籍籍臣首

居參預豈容委諸人以自解臣宜去之罪三也自春徂夏雨澤愆期兼旬以來飛蝗蔽野漸害苗稼星文亦變災異稠重咎證不虛天意可畏臣之尸素衆責交歸臣宜去之罪四也罪之大者有此四事其他過謬未易悉數容其自效已是寬恩是尚得為無名乎況又有大不可者臣賦性褊介遇事輕率常是少所回護且復拙於關防或因形似易致猜嫌積疑成間積間成隙非特不免身危亦將上誤國事目前難以力辨他日終當自明

加之賦分涼薄福過災生五十之年蒲柳早衰目視昏
花精神眩瞶省閱文書尚且費力況望其建明大議論
經畫大政事乎臣非不知數犯天威當膺方命之戮然
區區拙誠竊謂與其以不去獲罪於公言不若因求去
而獲罪於君父之猶為可解也欲望天慈特回宸慮亟
賜俞允免速顛隲臣不勝幸甚

辭免除職與郡奏劄

欽聞威命深震懦衷竊以通籍殿中示優賢之禮分符

聞外資御衆之才雖累朝以華輔弼之歸然近世尤吞
器名之假如臣者謀非經遠功不蓋愆內懼滿盈而挺
灾外虞曠戾而招謗疊封章而丐去紆宸眷以曲留至
於再遣王人親形詔札臣之得此抑有榮焉惟是殊恩
久無前比豈容駕下併冒寵光苟控避之弗堅將顛隳
之愈甚伏望收還成渙改畀叢祠不惟自計之甚明抑
亦人言之少塞

辭免皇太子受冊轉官奏劄

聞命震惶靡知所措伏念臣病悴餘生迂愚末學頃者
承乏政地備數宮僚亡補涓埃旋即罷斥屏居田里望
絕雲霄茲以冊寶告成例敘賞典邦家大慶臣子至榮
而臣席寵已多逾涯是懼矧迺無功而受祿尤慙不稼
而取禾更冒穹階難安私誼伏望皇帝陛下曲垂淵鑒
俯亮愚衷追寢誤恩庶全微分所有恩命臣未敢祗受
再辭免除端明學士官觀表

奏牘上聞冀趣收於誤渥詔函中錫未濬發於俞音輒

攄怵迫之誠疊冒穹窿之聽臣某中謝臣竊惟班高遂殿
蓋體貌於勲賢祿厚真祠本優崇於耆老顧方從於廢
黜曷并竊於寵靈伏念臣狷介不移戇愚自信棲棲寒
蹟山林之日居多耿耿寸心畎畝之忠徒在偶遭親拔
猥預繁機欲裨更化之清明固知陳力之短淺器小任
重果速顛隳咎大責輕訖蒙恩宥自屏居於田里久安
分於漁樵憂患相挺弟昆凋落疾疴不貸齒髮衰頹靜
惟坎壈之餘殆絕榮華之望豈圖眷軫未忍棄捐肆頒


渙號於崇朝盡復政塗之異數叨踰過甚跼蹐難勝恐
益重於悔尤敢洊伸於控免伏望皇帝陛下廣惠慈而
待下惜名器以馭臣念臣孤蹤兢惕之深察臣平日循
守之素貫其煩黷許以懇辭或追寢於隆名俾祝釐於
閒館一俯再偃願垂鑒於由衷曲謹小廉庶獲全於末
路臣無任

謝端明學士宮觀表

班聯秘殿仰依龍宸之光官庀祠庭俯遂燕居之佚省

循莫稱慙懼弗遑中謝伏念臣初乏片長素忘求進當睿
斷更張之始丕振朝綱拔微臣孤陋之中俾專憲席未
閱兼旬之久晉參兩地之華憂思徒罄於乃心何裨廟
論望實不孚於衆聽遽費嘖言凜危蹟之疾顛戴洪私
之全宥身棲農圃紛白髮之寢生夢繞觚稜耿丹衷之
獨在詎期軫錄驟賁寵靈還舊觀於隆名沛新恩於閒
祿顧茲起廢豈曰勸功瀝伸懇款之誠覲安私誼游奉
溫純之詔迄閔俞音茲蓋伏遇皇帝陛下覆幬如天照

臨若日務全體貌將加厲於臣鄰靡間瑜瑕示昭明於
公道特憐寒蹟嘗誤深知曲推救拭之仁庸錫便蕃之
渥臣敢不益堅晚節罔替初心修香火之勝緣敬祈曼壽
答乾坤之大造誓畢餘生臣無任



欽定四庫全書

集部

後樂集卷

八

詳校官庶吉士

臣翁樹培

主事

臣

呂雲棟覆勘

謄錄貢生

臣

張大同

欽定四庫全書

後樂集卷七

宗 衛涇 撰

表狀

明堂禮成賀表

王者之堂行王政紹講彌文天子之孝事天明丕承靈
貺一純所格四表交訢臣某竊以聖朝遵三歲之祠古
制復九筵之秩皇祐合祛而肇始紹興間舉以為常肆
參述於閑規凡四行於宗祀恭惟皇帝陛下適光駿命

祇迪燕謀之德之純茂建中和之極我將我享允通精
禋之交對越靈心告成熙事更旁流於霈渥用敷錫於
嘉生臣心拱闕庭身棲農圃想多士奉璋之盛莫綴駿
奔同斯民擊壤之安共陶鴻律

瑞慶節賀表

辰會于蒼龍尾就盈數焉社鳴而聖人生時純熙矣紀
休期於震夙增寶祚之榮懷臣某中賀恭惟皇帝陛下
大德懋昭小心抑畏春秋鼎盛屬萬國之本於元良弓

矢載橐籥一世之民於仁壽昔在高宗享國丕若有夏
歷年率由嘉靖於庶邦式克洪舒於景命於皇盛旦高
揜前徽臣頃玷邇聯自干大戾心傾葵藿幸逢漢日之
再中身在江湖徒望堯雲而三祝

又

五百年生聖聿開良月之祥三萬歲成純丕祝後天之
算臣民愷懌宇宙清明臣某中賀恭惟皇帝陛下治襲
緝熙業成耆定祈天永命泰元增神筴之休陶世至和

皇極斂洛書之福茂迎誕序益鞏珍圖臣敬效嵩呼殊
瞻星拱彤墀在望惟存北闕之心金鑑效忠願贊南山
之壽

又

冬日在尾聿開千歲之符國壽齊箕丕篤一人之慶乾
坤薦祉海寓蒙休臣某中賀恭惟皇帝陛下業懋緝熙
法循恭儉邊垂不聳永交玉帛之驩年穀順成盡洽農
桑之化茲標誕序式對昌期天開有永之齡民獻無疆

之頌臣身棲田野心繞闕廷職在叢祠惟效祝釐之敬
呼同嵩嶽願賡歸美之詩

又

构建乾方旬餘陽數占鬱葱之上瑞紀震夙之初生臣
某中賀恭惟皇帝陛下志氣如神光明不疚孝儉冠百
王之德盖本天姿休嘉正三代之符方綿世祚屬茲華
旦翕若懽聲衆星拱極以常尊萬歲呼嵩而必壽臣昔
陪邇列今玷真祠地闢天開喜協大來之頌日升川至

願賡多益之章

辭免除資政殿學士知潭州奏劄

自天有命無地措躬伏念臣樛櫟散材崆峒末學頃緣
忝竊自速顛隳蒙公朝拔拭之恩賦真館優閑之祿聯
榮規禁席寵里門每憐孤跡之兢凌曲荷至仁之全度
二年香火一意漁樵敢誤隆私并頒異數加職視政塗
之舊起家臨南紀之雄曾未服勞於隆名而易稱矧方
試郡豈閭寄之能勝在私誼既所未安顧公言實為可

畏伏望皇帝陛下皇明委照聖度包荒俯矜懇惻之愚
盡寢便蕃之渥姑仍舊列再畀叢祠尚期犬馬之餘生
圖效涓埃於異日

再辭免除資政殿學士知潭州表

臣甫上異章遽頒溫詔恩光滋厚感懼交深伏念臣起
自諸生本無才術受爵不避竊位寢高每自愧於罔功
且久尸於閑祿更蒙選擇俾與蕃宣固當勉效於驅馳
庶或少圖於報稱第惟南楚夙號大邦方潢池帖息之

餘正碧幢拊循之始非威望素著不足以鎮安封部非
識慮深長不足以潛杜奸萌兼斯二者乃克勝任而臣
早衰多病力不逮心儻冒昧以祇承將疾顛之難免矧
陞祕殿庸待有功既未施毫髮之勞是亦重淵冰之懼
敢伸危悃洊瀆嚴誅伏望皇帝陛下俯霽霆威廣垂日
照亮其辭非貌飾蓋學心孚察其誠匪身謀寬為國慮
併回新渥姑續舊祠庶允穆於師虞亦少安於微分

潭州受告謝表

江海摧頽已規終老湖湘遠重忽玷起家驟晉隆名游
勤溫詔靡皇懇避第切凌兢臣某中謝伏念臣奮自諸
生親逢熙旦學雖是古材弗逮於昔人慮切愛君智靡
周於當世頃聯清貫但務直躬放歸坐廢者八年更化
首瞻於一日又因顛越竟負寵靈脩香火以杜門課農
桑而卒歲敢圖記錄復荷使令顧是庸虛若何稱塞茲
盖伏遇皇帝陛下至仁覆冒盛德感孚體貌臣隣愛養
黎庶四通六闢闡大公至正之塗上際下蟠脩極治太

平之業既以兼收於衆雋亦復弗棄於散材臣敢不砥礪壯心激昂暮景雖乾坤博施難酬報答之私而民社布宣試竭撫摩之力俟臨所部續奏以聞臣無任

南郊禮成賀表

丕靈承于上帝拜況于郊用敷錫厥庶民並受其福備成熙事美叶嘉生中賀恭惟皇帝陛下翼翼小心兢兢行道氣和格天地之應百穀用成兵寢極帝王之功四方無侮肆循鉅典間舉縉儀泰峙八觚肅圓丘而歲事

細書一札撫方夏以湛恩臣濫守麾符阻奔邊豆懷綏
楚甸使僅知縮酒之供迹託湘流媿莫奉受釐之對

辭免郊祀特旨轉官奏劄

伏準尚書省劄子勘會更化之後親祀南郊熙事備成
慶均中外安丙衛涇俱以近臣宣勞藩閫各特轉一官
者聞命震驚罔知所措竊念臣踈庸晚學衰朽餘生頃
自祠庭驟分藩閫盡出清衷之簡記敢辭末路之馳驅
適當倣擾之餘孰若拊摩之急粗殫綿力甫閱三時仰

憑聖德之宣昭幸底軍兵之綏靖雨暘咸若年穀仍豐
仕不覲于能稱人亦安於拙政粵從更化始講親郊精
誠上格于天神慶澤實均于中外而臣屬縻遐徼阻造
昕朝既莫預于駿奔且歲聞于治狀忽叨進律宣謂罔
功徒緣嘗廁于近班遂許例霑於渙渥揣微躬而易稱
懼公議之難逃伏望皇帝陛下量廣乾坤明垂日月鑒
由中之至懇畧反汗之小嫌庶保孤蹤尚圖來効所有
省劄未敢祇受

郊祀加恩謝表

宣室均釐及長沙而承惠徹侯啟國因茂苑以疏封併
增食采之腴深積伐檀之愧臣某中謝伏念臣心誠拱
北職實宅南清廟肅雖阻預駿奔之列紫壇溫豫莫宣
騎導之勞敢圖天咫尺以不違例霑人三百而無青茲
蓋伏遇皇帝陛下靈承于帝敷錫厥民非功不侯曲念
遺簪之舊多與之邑庸昭上胙之盼臣俯俚中慙凌兢
下拜包茅當貢敢忘王祭之供蓴菜可思尚乞戶租之

食臣無任

謝加邑表

泰時八觚敷錫配天之澤衡山千里祇承零露之恩官
既特遷邑仍多與併衍真腴之食益增假守之華臣某
中謝伏念臣族本單平材非超卓徒守樸忠之節誤蒙
神聖之知馴致顯庸難逃幽黜清時有味甘竊廩以奉
祠白日無私遽起家而分閭於皇更化有赫親郊宣室
受釐賈誼正留於湘水雲陽奉玉馬遷實在於周南敢

謂熙成特加蕃錫茲蓋伏遇皇帝陛下仁深遠服恩厚
舊臣上帝是歆豈洪休之專鄉爾身在外等近列以疏
榮臣敢不祇服龍光力鞭駑鈍厠大夫而陪議期無愧
於隋官詔御史而著中願有稱於漢令臣無任

瑞慶節賀表

千載應期咸覩堯齡之永十月上壽仰瞻漢典之新四
海嵩呼萬邦星拱臣某中賀恭惟皇帝陛下乾綱獨總
離照重明守成光紹於基圖更化聿來於福祿流虹繞

雷式膺眷祐之申就日望雲悉遂瞻依之願臣猥分藩
閫阻造闕廷近指南山歌一詩而報上載同湘水流萬
折以歸東

謝賜臘藥表

一札細書賁于寒谷萬金良藥益以珍奩戴大德之好
生惕微躬而增感臣中謝伏念臣叨分藩牧再見嘉平
楚軍多寒媿乏撫循之實湘魂易悴况驚遲暮之年敢
圖內府之匪頒不問外方之遐遠餌由仙授服可使其

翼生器有禮藏銀豈容於羽化茲蓋伏遇皇帝陛下仁
深念舊令謹授時所寶惟賢召匠不嫌於百計其疾在
腠用醫欲使之十全臣幸逃殞越之虞當効糜捐之報
臣無任

元正賀表

春王正月肇稱獻歲之儀天子萬年增衍泰元之策永
膺多福敷錫庶民臣某中賀恭惟皇帝陛下道體泰亨
德儀震動太歲在酉民益富於酒漿休命用申化愈張

於琴瑟嘉與林林之衆並臻堪堪之祺臣承惠守藩馳
心戀闕讀離騷賦既逢湘水之孟陬奉寬大書願布楚
鄉之農事

謝賜夏藥表

六月徂暑甫許合於銅符一札成文遽寵盼於珍劑熱
中頓釋拜下益共臣某中謝伏念臣久佚祠庭驟膺藩
閫倚清淑之衡嶽寧慮鬱陶造卑濕之長沙反逢蒸鑠
鼎來和餌隨解焚氛益以朱提之珍賁于赤社之分此

蓋伏遇皇帝陛下對時令謹念舊恩深歌南風之薰不
私殿閣賜西山之藥無間江湖衛生既免於臥病報國
敢忘於盡瘁

瑞慶節賀表

天開赤伏之符篤生元聖日在蒼龍之尾式應昌期華
渚流光縣區稱慶臣某中賀恭惟皇帝陛下德全神聖
功極帝王協休運於千齡紀誕彌於載夙十九載離明
之治大振權綱億萬年鼎命之凝永延福祚臣幸叨近

列猥守遠藩奉十月之玉卮遙瞻漢闕望一星之壽軫
仰贊天工

謝賜臘藥表

細書賜郡正臨大蜡之辰上藥頒庭就貢中金之器拜
承恩旨頓失寒顏臣某中謝伏念臣假守蠻荆馳心象
魏賜金所以褒循吏愧治狀之蔑如和藥所以活功臣
慙勞能之無有歲忽忽而道盡皇剡剡以揚靈珍劑芬
馨似出蓬萊之菜鐐奩焜燿有光蘭菊之餐此蓋伏遇

皇帝陛下加惠舊臣寵華遠服念長沙之濕河魚之疾
奈何飲上池之清廐駒之病起矣仰體好生之德誓殫
盡瘁之年

元正賀表

歲在闕逢三日先甲律中大簇萬物出寅茲惟行夏之
時孰匪就堯之日臣某中賀恭惟皇帝陛下湛恩汪濊
受命溥將三光全寒暑平愈加寅畏五穀熟人民育益
厚撫摩玉衡占七政之齊木鐸謹百官之徇履端於始

受祿無疆臣承惠守藩馳心望闕孟春之月為陬月己
開嗣歲之興長沙之星曰壽星請效封人之祝

謝賜夏藥表

庚金流火欲焚荷芰之衣申錫自天又拜蓬萊之藥分
盼器寶彌浹汗珠臣某中謝伏念臣一出宅南再逢徂
暑北窓之涼有味豈不懷歸西風之鱸可思誰能執熱
徒念報恩之無策屢欲引疾而難言赤箭之良忽賜來
於御府朱提所出又賁飾於私庭茲蓋伏遇皇帝陛下

後天奉時視人猶已遣將帥以守衛不忘饑渴之懷知
臣下之勤勞預軫痛瘡之念致茲珍劑馳及遐陬臣既
免負薪之憂惟思結草之報臣無任

瑞慶節賀表

十月維良斗正乾剛之位一人有慶帝開震出之祥屬
是昌期敢忘伸祝臣某中賀恭惟皇帝陛下先天法道
首物體仁以英睿之斷總攬權綱以慈愛之心密參化
育二十載無為而治視古獨隆億萬年有道之長自今

以始臣叨蒙聖眷猥守藩封望北闕以馳神威不違於咫尺指南山而稱壽頌莫既於形容

謝賜對衣金帶鞍馬表

襲衣寶帶出自掖庭駟馬繡鞍來從廐庫下賜式昭于體貌拜恩有覲于面顏臣某中謝伏念臣韋布素心駑駘末技絲積寸累欲學為裘外彊中乾偶逢市駿比歲屢叨于器使頻年數假于服章茲叨書殿之大名又被聖朝之縟典特頒上笥且解左驂顧朽質之甚華于遐

觀而有耀茲蓋恭遇皇帝陛下政猶御六賞不褫三以
臣嘗禦楚國之寒衣非宜薄念臣久處長沙之濕馬必
用良遂興衰鈍之憐迺錫便蕃之渥恩榮賁飾修身益
謹于道存矍鑠驅馳報國敢云于齒長

潭州丐祠劄子

臣輒瀝愚衷上干睿聽伏念臣冒膺隆委起殿大藩自
惟心志之早凋無復事功之可見雖殫駑鈍何補毫分
仰賴陛下聖德之宣昭朝廷威靈之遠瞻峒民妥息年

穀比登田里相安獄訟漸簡官兵之廩稍僅足倉庫之
儲蓄增加臣忝竊居多滿盈是懼吳楚相望數千里
一家兩地災患頻仍功總之喪交馳計問三孫幼子相
繼夭亡皆繇微臣命薄食浮福過災生之所致闔門賤
累日夕念歸方陛下欲久任牧守之時而廷臣有循例
引辭之奏黽勉滿歲又踰兩月迫於私計出自懇誠況
拙技之已窮將曠官之難免慮貽物議徒負君恩欲望
聖慈加惠衰蹤興憐舊物許釋閩寄改畀叢祠庶少佚

於餘年且獲全於末路干冒宸聰臣無任

第二次丐祠劄子

臣輒披中赤上瀆睿明臣去年八月嘗以災患頻仍私計不便奏乞宮觀差遣伏蒙聖慈特降詔書不允訓以忘家之誼期於治化之孚仰惟君父至恩在臣子所當縻捐庶幾稱塞黽勉官守不敢嗣陳又八閱月緣臣材術空疎賦予涼薄入仕以來叨塵中外任使僅踰十考居閑殆二十年蒙陛下疏寵起家俾分閭寄適承兵盜

之後姦弊百出雖鞭策駑鈍補苴緝理迄無毫分可以
自見重以齒髮衰晚疾病交攻酬應事宜智慮短淺省
閱文案目眊昏花入春多寒脾胃凝滯飲酒頓減舊苦
足弱遇濕轉加非少休息醫藥難效深懼寢隳職業自
速罪愆矧惟全楚重地抑豈養痾之所顧圖報之心實
切而知止之分當明伏望聖慈察臣別無規避憐臣非
敢為欺許解藩符姑從祠廩儻犬馬之力未疲於他日
則螻螳之義敢負於夙心干冒天威臣無任

第三次丐祠劄子

臣某近具奏再乞祠祿上千天聽本合祇候回降緣臣賦分淺薄久叨榮寵福過災生兼多病早衰不善調攝近於正月十八日感冒風寒忽覺力乏氣弱雖可勉強履地然語言不甚周正臂膝舒緩醫者謂心力過度脉氣虛損為風邪所侵度須旬月服藥調治方可漸愈竊念閭寄至重誠非養痾之所伏望聖慈檢會前奏予臣祠祿使得退歸田里一意醫藥因得休養庶可少延殘

息實出天地生成之德干冒天威臣無任

第四次丐祠劄子

臣某敢干違命之誅再上籲天之請臣近累具奏乞罷就祠祿疊奉詔旨尚閤俞音始者投誠君父徒以桑榆漸迫蒲柳易衰精神瞶昏心志凋耗故祈閑退以佚餘年雖蒙天聽未回尚可勉強治事忽為風寒所中臂膝緩縱舉動頗難語言亦覺澁訥不正治療踰月尚未減損病在經絡平服未期若非專意醫藥在臣一身為末

疾沉痾終成廢人若或頻頻在告於臣本職雖委之僚屬深恐廢事反復思慮進退靡遑竊念臣嘗忝近臣義當體國伏讀明詔祇服訓詞豈不知數易有送迎之費久任有責成之圖而臣病軀非可卧治徐行尚須扶策何以延見吏民安坐猶且歆傾何以省閱詞訟至於朝拜行香皆恐不能親事猶復貪戀榮祿不懼滿盈恐災咎之愈加將溝壑之難免是用祈哀再干洪造欲望睿慈俯憐舊物察臣樸直素非矯偽特降指揮與臣宮觀

俾得生還里廬一意將理庶延殘喘免致顛踣實出天地生全之賜數冒天威臣無任

謝免荆湖南路安撫大使兼知潭州依舊宮祠

表

籲天請命方虞雷電之誅稱物施仁遽霑雨露之澤荷恩益腴撫已增慚中謝伏念臣少也過庭嘗聞詩禮之訓晚而遇主濫陪宰輔之司雖迂踈素乏經世之遠猷而周慎常謹律身之小節坐罹讒毀皆出怨仇馬援謗

深誰與辨明於薏實義之誓苦但期終老於蘭亭豈謂
大君未忘一介起於閑地付以名藩而臣景迫桑榆衰
先蒲柳憂畏深矣直類傷弓之禽疲瘵惔然久抱負薪
之疾既不獲黽勉以承命又深懼稽遲之速辜夙夜靡
遑進退維谷念父母之於厥子惟疾痛之為憂而天地
之於群生俾飛潛之各遂力布由中之懇果蒙從欲之
私琳館優游尚叨厚廩海邦深遠仍許便居此蓋伏遇
皇帝陛下體道宅心用人惟己不遺簪履之舊物每賜

記憐尤矜樛櫟之散材曲加芘覆致茲孤陋亦獲保全
臣敢不克戒暮塗益修素履甘山林之寂寞一洗五十
七年之非憑香火之因緣上祝億千萬歲之壽

辭免除資政殿大學士知隆興府奏劄

臣昨兩具奏乞罷就祠館歸休田廬疊拜璽書未賜俞
允欲投誠君父再申前請忽準省劄除臣資政殿大學
士知隆興府江西安撫使填見闕者更移重鎮加畀隆
名厚恩如天跼蹐無地伏念臣蒙陛下記憐付以分閫

之寄黽勉夙夜庶幾稱塞所幸年穀屢稔枹鼓不驚憑
藉威靈粗免曠敗臣年齡已暮識慮就昏疾病交侵災
患頻有自揣涼薄終難報効未敢遽乞骸骨且欲上還
印綬姑竊祠祿以佚病軀此臣由衷之情非有一毫欺
偽湘中事簡訟稀猶懼弗克負荷江右襟帶之州地望
雄重民物繁夥相去何啻倍蓰豈臣衰病所堪況大學
士之稱前朝本以優禮勲舊尤非無功所宜冒處繇遠
移近雖陛下欲俾少慰其歸心求退得遷使微臣何以自

逃於物議不避煩瀆再有奏陳欲望聖慈檢會臣前奏特降睿旨與臣宮觀差遣倘暮齒得全於休息則此身終誓於糜捐所有省劄臣未敢祇受干冒天威臣無任

再辭免除資政殿大學士知隆興府表

一命循牆所祈從欲十行賜札未拜曰俞凜誤渥之難任瀝忱詞而游瀆中謝竊以崇儒書殿美名無過于大稱牧帥蕃宣重地孰加于潛躍必德望素高者克堪華選必治行有異者始副殊遷如臣奮自羈孤進非介紹

蚤歲玷名于俊造中年屏跡于耕樵屬聖治更新愧罔
功于輔政荷公朝念舊過假寵以分符自託迹于湘流
類素餐于河側私門多故公務有妨矧迫衰遲易生疾
疢精神惟恐其不逮政事每虞其未醇徒積曠瘳敢云
報稱嘗再上叢祠之請欲少全末路而歸既淵聽之莫
回又湛恩之有忝力求反汗更冒揚綸臣固拙于身謀
豈弗慮難居之諂臣雖踈于世故詎不知自近之榮私
竊揆中實難拜下伏望皇帝陛下制恩以義賞善惟公

令無憚于亟還印何嫌于久弄博咨耆彥改畀徽章許
臣結香火之緣為國祝乾坤之筭則爵罔及惡德庶允
合于前言而譽不進無功抑有裨于實政臣無任

謝新知隆興府受告表

命出自天序進內朝之職恩隆易地洊持外閫之權懇
辭粗罄於寅恭訓飭重勤於申命凌兢亟拜俯仰惟慙
臣某中謝伏念臣性拙弗移材疎自信當孝廟七臨軒
之際偶冠儒科屬陛下更化之初叨居政府感精神

之聚會忘蹤跡之孤單參預何功直為孚實顛躋罔覺
宜爾速辜退思維務于省愆均佚又從而起廢俾兼榮
於月殿以承惠於星沙策磨朽鈍兩歲有奇考試功能
萬分無一幸不致于乏絕乃免蹈於譴訶然弱質易衰
斜日自傷于鵬翼況歸心未遂秋風每憶于鱸魚載騰
上印之章反被賜書之渥中聯禁直班實忝於文明外
擁侯藩望益尊于潛躍詎應濫及仍斷牢辭茲蓋伏遇
皇帝陛下建官惟賢用人由己遵虞典陟明之制考漢

卷七
條察治之規謂臣親被選掄嘗與聞于國論知臣屢膺
更迭必熟識于民情加以隆名往哉督府臣敢不欽承
睿獎恪守樸忠居寵思危當佩聖賢之謨訓投閑置散
祈酬君父之慈憐臣無任

新知隆興府到任謝表

解湘埂之舊組幸免黜幽分洪井之新麾猥膺試可奔
命敢言於道遠抗容俶抵於司存爰進爾民具宣上指
臣某中謝竊以維斗所直是為控引之區循江以來厥

有臨觀之美在昔謂之督府於今升曰潛藩謀帥孔難
得人乃重減宴而餘於粟仲舒之德績可傳免賦而裨
之財韋丹之名聲不朽必有材之是似則共理以奚難
矧九重弄印以疇咨方百辟盱衡於誰與如臣者年衰
戒得日奏罔功比承惠以宅南每懷憂於敗北偶值連
歲豐登之候適當清朝綜核之時粗知戢吏以安民稍
可整兵而立武皆由帝運何有臣能及茲所領之邦非
昨苟安之地生聚繁夥習俗輕揚儻控御失宜易致弄

兵之患而撫綏無狀曷銷珥筆之風迫甚促行冒焉即
次顧弗容於俯避何以副於仰成茲蓋伏遇皇帝陛下
操約御詳循名責實並觀內外初無輕重之殊加惠黎
黔勿問邇遐之間爰晉殿帷之高職俾臨襟帶之奧區
報稱則亡凌兢曷已臣敢不益堅晚節仰答殊知惟玩
惕是懲田里能銷于愁歎庶蕃宣小補冕旒或釋於顧
憂

賜夏藥謝表

守藩引疾甫離地濕之區賜璽更生亟拜天題之詔實
以鐐奩之劑薰其寶殿之涼臣某中謝伏念臣智匪十
全材非百試比分湘閩每懷卧閣之慙茲易洪都預有
負薪之懼矧未求於民瘼敢自覺於神疲當流金鑠石
之時正惟奔命被飛雪圓冰之貺遂可清心茲蓋伏遇
皇帝陛下德並好生恩推解慍爰賜珍良之品以昭長
養之私授南嶽之銀砂已屢承於聖惠賜西山之丹鼎
願益廣於君仁

明堂禮成賀表

肅霜屆節嘉觀萬寶之成吉日用辛敬秩九筵之祀光
增謨烈事軼簡編臣某恭惟皇帝陛下剛健日新聰明
時乂希夷體道誕膺滋至之休淵默凝神坐撫寢昌之
運謂孝以嚴父為大而聖以嚮帝為能爰稽汶上之圖
仍舉洛中之典合宮陟配既親三歲之祈宣室受釐益
茂一人之慶臣昨叨政路茲守帥連侍祠莫率於臣工
肅展奉璋之禮宅牧敢同於父老形為擊壤之歌

明堂加恩謝表

大饗告成仰叶房心之次細書均惠俯臨牛斗之墟鈞
天遠隔於九重駢邑遽加於三百循牆莫避踏地知慙
臣某中謝伏念臣頃備四鄰愧無一善涖玷竹符之守
粗知茅祭之共遵豆靜嘉阻預駿奔之列旗常婀娜莫
瞻魚雅之容敢圖簡上帝之心且欲教諸侯之孝越在
外服益以圭田茲蓋伏遇皇帝陛下涓選休成參侔開
闔燭明四極肇脩五室之祠逆釐三神敷錫庶民之福

重此采薇之遣帥忘其不稼而取禾臣敢不進服龍光
退鞭駑鈍配天其澤詎容私受於君恩食土之毛願使
同霑於聖化臣無任

瑞慶節賀表

太歲建亥符三豕之渡河衆星拱辰賓六螭而出日乾
坤齊久華夏均懽臣某中賀恭惟皇帝陛下纘禹儉勤
躋湯聖敬嗣無疆之大歷惟德動天惠難保之小民以
仁守位應千齡而載震斂五福以誕敷臣濫守銅符阻

陳金鑑西江水遠但遡海以朝宗南浦朝飛惟望雲而
頌禱

謝賜臘藥表

賜一札之璽書惟同挾纊拜萬金之寶劑憂釋負薪恩
重和鬚感深至骨臣某中謝伏念臣比叨再命游長十
連材乏參苓曷蘇民瘼質同蒲柳坐閱年華方虞寒齧
之嚴凝忽被溫綸之寵渥仰翠管銀罍之來下覺朱簾
畫棟之生輝茲益伏遇皇帝陛下禮遇舊臣澤加新府

憫其疲瘵錫以珍良俾無晦冥風雨之侵庸効屏翰蕃
宣之力臣敢不布中和之樂職問疾苦於窮閭五色有
光日服仰承於魏帝十全為上歲終益謹於周官臣無
任

元正賀表

歷正夏時驗三陽之交泰祥開吳分應五福之照臨四
方無虞一人有慶臣某中賀恭惟皇帝陛下體仁以長
求道之端八十七萬七千而統元復見堯年之丙子三

百六旬六日而成歲載觀義仲之寅賓誕敷堪堪之祺
均錫林林之衆臣一違北闕七見東風過九江至敷淺
原濫司鎮撫以立春下寬大詔惟謹奉行

隆興府進葛布表

垂裳在御歌奏五絃掌葛征財職修九貢前件物治由
女事出自山農雖帝殿自有於微涼然方物乃所以昭
德服之無斁仰裨節儉之風衣亦有名俯脩恩榮之賜

又

虞帝垂裳諧五絃於夏律吳都產葛備九貢於周官江
介司十連之區方物效諸侯之獻前件物鮮如浣火細
稱含風輕輭生涼不減升蕉之弱被服當暑亦同絺綌
之清已踵豫州舉侯藩任土之制願同工部叨朝廷列
賜之榮

謝賜夏樂表

侯服剖符敢憚薰心之暑恩綸分寶載頒苦口之良暝
眩用瘳鬱陶有忸臣某中謝伏念臣初無善狀洊守雄

藩去湖即江漸近萑鱸之境玩歲愒日甚慚竹馬之童
氣方溽於伏庚恩忽流於令甲鼎丹分餌鑒白作奩南
土爾居自乏雙金之貢西山無極猥瞻五色之光茲蓋
伏遇皇帝陛下動惟厥時予馭其幸涼生殿閣既思雲
漢之側身地接衡廬更虞山數之藏疾速置郵而傳命
隆體貌以厲庶臣敢不謹視一方之人各思寸膚之愛
臣無任

丐祠劄子

臣坎墮孤蹤昨蒙誤恩起家分閩浮湘兩載無補事功
屢章丐祠更叨進職改帥江右控免弗俞黽勉之官已
十閱月豫章比之長沙差為簡靖然控引蠻越責任不
輕俗喜珥筆吏多舞文臣奉法循理不敢苟且每事必
須剖白是非務使姦邪屏息直己忤物寧免怨仇去年
諸郡歲事幸頗豐稔今春峒丁小警尋已平寧入夏以
來稍苦乾旱臣祇受詔旨精加祈禱幸而得雨各已立
秧接續更獲沾足則秋成猶或有望目下猷畝粗安府

庫粗給綱運起廢無滯官兵奉廩無虧莫非憑藉朝廷
得以玩愒逃責然臣蚤衰多病筋力弗強政拙心勞神
疲形悴老態已具目力漸昏加之一出四年拏累多病
量材度德既恐妨賢尸位素餐亦足招譴自揆甚審誠
非飾詞欲望聖慈令臣早釋郡寄歸休田野或未忍棄
捐卽畀一祠祿差遣稍便醫藥不勝天地父母生成之
恩臣冒犯天威臣無任

第二次丐祠劄子

臣某近以治郡罔功衰年多病嘗具奏劄陳乞退閑或
畀祠祿伏蒙聖慈特降詔書不允臣仰戴天地大施糜
捐不足報稱深願勉扶孱質圖效民庸庶幾少副陛下
委任責成之萬一臣以拙慙昧於攝生今夏苦熱異常
觸冒寧免暑毒溫客邪於經絡入秋以來遍體忽苦瘡
癩在股一疽疼楚焮腫幾大於杯呻吟一榻之上為廢
寢食踰旬始潰至今尚妨步履雖牽強酬應須人扶掖
又緣臣屢更憂患氣血早衰因此傷動轉覺疲憊若非

一意休養未能復舊支離之狀吏民所覩靖念閭寄至
重非臣養痾之地儻或隳弛職業自速顛隳上負聖主
覆露之恩下垂微臣進退之誼臣竊為懼是用再瀝忱
悃塵瀆睿明伏望聖慈容臣姑奉叢祠暫還田里使得
稍便醫藥全度餘生他日未委溝壑別備驅策臣所不
敢辭言實中情期賜矜允臣無任

瑞慶節賀表

龍姿日表聖符繼作之君虹渚電樞瑞洽大來之慶宣

惟良月屬是昌辰侈華祝於黔黎沸嵩呼於蓋壤臣某
中賀恭惟皇帝陛下天臨四海子惠萬民危微允得於
心傳勤儉克全於躬履世臻極治功已底於更絃節紀
誕彌命益隆於凝鼎臣叨居近列猥守遠藩再拜稱萬
壽觴雖阻趨於漢闕十事上千秋鑑願竊效於唐臣

謝賜臘藥表

守潛邸之銅符再逢清祀分禁庭之珍劑又賜細書帝
有恩光臣無治狀臣某中謝伏念臣一寒晚出多病早

衰夙夜服勞恐負洪都之新府烟霞成痼願修黃石之
舊祠氣方凜於折綿言已溫于出綈兼金百兩直東海
之爛銀五色一九殆西山之仙藥歲云暮矣欲並成哉
茲益伏遇皇帝陛下體視群臣躬持八柄雖爾身在外
曾微橫草之功續乃命于天庶免負薪之疾臣敢不望
咫尺顏而下拜誓九殞以為期臣無任

元正賀表

行夏之時鳳紀始四時之布立春之日鸞路先三日之

迎叶氣交通歡聲洋溢臣某中賀恭惟皇帝陛下體元
乾長視吉履端陰慝旁消溫厚勝嚴凝之氣陽和普施
財成全輔相之宜廣木德之發生衍蘿圖之昌熾臣神
馳北闕迹繫南州太極稱觴莫與元朝之獻壽呼韓款
塞佇觀正月之來朝